

oitetj geginamatingeoeigtog tan telgitasit, ag oigotj apógónematimgeoei alasotmaganigtog ag gtjialasotmaganiigtog, ptjilio gemnieotigtog. Tapoóoei tesitjig gtjiosog oigoag tli gsalititj istege Sesos, Mali ag Sóssep; eig oli ginamoatitj mitjoatitj oigoag ag geginamoógoomigtog. Sisteoei, migoitetemenetj Oestaolg alsomolg mo paseg gtininenag gisna gigenag, oitjei gotanminag, gemetginag ag tan tetotig Inogtagig; na otjit msatami gepmitelmot, tjtjsetot ag etjigelatasigel ointjigel gógoel; elp apógónematoltigop gmesoi logóoaneno tan maoi gisolgos ag metj nigetj pemi angoeiolog.

ADAMSVILLE—neonemigsitjig Inog, Toma Silpel 4, Pelnape Piel 5, Toma Tj. Piel 4, Piel Nagot 4. Tógo Sent Pólg elp neonemigsitjig.

SETNI ONAMAGIG—epel 18 tes.—Tet otmótagen pemiag otjit na pogteoitjig otelatagen, nige eoletjoltitjig nigani pogoltitjig tanig oantagóti elogootemittj gesinogagoltitjel otjit tan teli melgigenatj mento tan teli asim-atj gtegieoinotja, teloemg mógoe gisalogitiog laplosena; gato eig na apgteg tan maoen paseg nesisgegogenag imoga; gato eoletjiltjig nigani pogoltitjig me mógoe gipapeoltjig otjit gato paseg pogteoitjiga siaoitatjig tan telogóoatitj Angoeiologola ag atignatjig tan teli nagatotitj pogteoitjig ola gonleoitgoga. Nin A. P.

Inog ONAMAGIG melgigelnemittj otalasoatmagenemaoo, otjóoa patliasa Mosi Meialóg gisi ginamagoitipeneg osigentasotimooeog, me ngotei gisggog mógoe nagmianog tan teli pmatotitj alasotmagenag; ag neogteteli gsate-mittj osetanemoóo pótlóteg tan gisatagoitip otjóoa patlias, ag tjel me sag piami olóltisenig gisigogig msat gesaltoltsisenig ag neogtitetemitis tan teli maotietj setaneoitipa telegsepenig stage oen neotetjijtjela; lóg pa na pe-
tjiti gelnemitsiseneg na oteleineoo, ag mógoe oema pogteoitjigigop, meta lóg gepmitetemitis osetanemoóoa, ag lóg menagatjeoitiasenig gisigogiga; gato glapis me aptj igasenig tanig pogteoitjigtja, net na gato mógoe oelaptemittogsep gisigogig tanig nigani pogotemotitis olapaloeseoóo, tjel glapis teloesenig, tales igatogo agnotemangoei gsetaneminag oen petji pogteoitjigtj lalaten gamneg igalaten oegao pagietja; na gato lóg pegitji gelnasigsepeneg; netna gato me aptj eigesenig tanig oetjinogatemitsiseneg get.

lóg na gisi tlagogsin oen pogteoitjig ag pa miamotj teli msenemitsiseneg, gato paseg neogt tellagsopnema, mógoe oelitetasinogsepeneg tanig oenig oigmatoltitjig mógoe oelaptemittogsepeneg; netna gisigogig nigani pogotemitis mset gógoei ponatotisiseneg; gato neogte teli gepmitetasig setan ag mógoe piámótasinog pogteoitjig tan totjio elitatitj omaoióminoaga, thoenes nigetj maltjeotj ansema pa teli ngoteg teli gsetetemititj setan, ansema paseg me sagaoegig gisigogig neogtitetemitisiseneg tan teli maotietjeg gesaltoltsisenig ag oeloigmagaltoltsisenig mo ngotei nige, me eigig emtesgoltitjig minen moiega na gato mógoe teli ngolapasinog mtesgimga. Nin Onameoatj.

Tet patlias getoi agnotg tan teli oetjítóg ola oison getjigao—pótlóteg—soel aasantasigsep Inoigtog. Sag ógotj Sen Pielsg tan tetli tepitimges teloitiasigsep oentjoigtog—Port Toulouse—netna teli napoisigsep gtjigan planseg tjei, tan elpa nige tetlagatg tan ninen aniaipsoimoi mkaoiómininen alsotg. Nige tóg na oisonigtog Port Toulouse Inog oetjatotis Pól toloseg, tógo Pótlóteg. Sgato menigo temg mosi Meialóg teloitgesep—santeoi gtjigso. Ag tliatj nige nogo pmi oitasig Setaneoel Menigo, meta natel miamotj negao natji setaneoiten, lóg oltiasig nin pleti alasotmógoóm esgisógnig tloitemen—santeoi gtjigso—ogtji migoitetemen iaptjio tan mosi Meialóg teloitgesep otalasoatmógoómem menigoigtog. Telitetem ógo piloei natami geneg ógoatnogoel gteg me sagaoel alasotmógoóm onamagig elitasigsep otjit gogomittjino Sent Ann, 1629 gisna oetjóo, tan me gisggog St. Ann's teloisig.

OEGOPEGITG—pageoimgoei tepg. 26, 1910—oetji oigemoit Ino sagmao Sóssep Gol ogógoatjatón tan ogtetjgeoei solnaltjigtog na oenel ópli oigigelisenel gis oponi sagmaoin; mo ógo na telianog misógo gsinog ponaneoitén. Lóg oetji oltiasí nín; tógo tesititj oelmetog mimatjainog natei negao pmi oli tjtjsetoatitj osagmamaol. Nin Inoi patlias.

Tan telgig ola migmagia me oen onemian gisna elp noteman oneplin tjinem teloisit Plansoe Toma Glaot, gis sag menag notemameg, oen nemiatj gisna notematj oneplin, sgemtog oigatigen Inoi patliasel oigmoatj lóg epit oltiasite notematj me oelina.